



Sud Bosne i Hercegovine
Суд Босне и Херцеговине

Broj: S1 3 Iž 043518 22 Iž
Sarajevo, 11.08.2022.godine

Sud Bosne i Hercegovine, u vijeću Apelacionog odijeljenja sastavljenom od sudija Zvezdane Antonović, kao predsjednika vijeća, Dinke Bešlagić-Čovrk i Mirka Božovića, kao članova vijeća, odlučujući o žalbi Alić Saliha, Alić Habibe, Alić Šejle i Alić Emine, N., ..., izjavljenoj protiv Odluke Centralne izborne komisije Bosne i Hercegovine broj: 06-1-07-1-608-3/22 od 04.08.2022.godine o odbijanju upisa u izvod iz Centralnog biračkog spiska za glasanje izvan Bosne i Hercegovine za Opće izbore 2022.godine, u nejavnoj sjednici, održanoj dana 11.08.2022.godine, donio je

R J E Š E N J E

Žalba se odbija u odnosu na žaliteljicu Alić Eminu kao neosnovana.

Žalba u odnosu na žalitelje Alić Saliha, Alić Habibu i Alić Šejlu se odbacuje kao nedopuštena.

O b r a z l o Ź e n j e

Odlukom Centralne izborne komisije Bosne i Hercegovine, broj i datum navedeni u uvodu, odbijen je upis u izvod iz Centralnog biračkog spiska za glasanje izvan Bosne i Hercegovine za Opće izbore 2022.godine po podnesenim prijavama do 19.07.2022. godine, jer nisu ispunjeni uslovi propisani odredbom člana 3.15 stav 1., 2. i 3. Izbornog zakona Bosne i Hercegovine. U odnosu na žalitelje odbijen je upis iz razloga što uz prijavu ne dostavljen validan dokaz o identitetu.

Podnositeljica žalbe navodi da je pitala kako da popune podatke i nije dobila odgovor, pa joj nije poznato zašto su odbijeni.

Centralna izborna komisija Bosne i Hercegovine u odgovoru na žalbu predlaže da se žalba u odnosu na Alić Saliha, Alić Habibu i Alić Šejlu odbaci kao nedopuštena jer je izjavljena od neovlaštenog lica, a u odnosu na Alić Eminu da se odbije neosnovana.

Žalba nije osnovana u odnosu na Alić Eminu .

Prema stanju u spisu ovo vijeće konstatuje da je Centralna izborna komisija BiH, prije donošenja ožalbene odluke, a prilikom razmatranja prijave za glasanje izvan BiH dostavljene dana 17.07. i 18.07. 2022.godine, pravilno uočila da podnositelj žalbe kao i birači u čije je ime podnijela žalbu nisu dostavili uredan dokaz o adresi boravišta u inostranstvu, obzirom da dokument koji su dostavili nije izdat od strane nadležnog organa kako je to predviđeno članom 10 Uputstva o postupku slanja, prijema, obrade, arhiviranja i zaštite elektronskih prijava državljana Bosne i Hercegovine za glasanje izvan BiH elektronskim putem („Sl. glasnik BiH“, broj 27/22) kojim je propisano da vjerodostojan dokaz o identitetu za birača koji privremeno boravi izvan BiH, a u vezi sa članom 3.15 Izbornog zakona BiH („Sl.glasnik BiH“, broj 23/01 do 51/22), predstavlja fotografisan, skeniran ili u drugom elektronskom obliku snimljen jedan od tri važeća identifikaciona dokumenta Bosne i Hercegovine.

Odredba člana 3.15 stav (1) Izbornog zakona BiH propisuje da državljanin BiH koji privremeno živi u inostranstvu, a ima biračko pravo u skladu sa Zakonom i koji je upisan u Centralni birački spisak, da bi se nalazio u izvodu iz Centralnog biračkog spiska za glasanje van BiH, dužan je da za svake izbore podnese prijavu Centralnoj izbornoj komisiji BiH. Prijava mora biti zaprimljena u Centralnu izbornu komisiju BiH prije roka koji odredi Centralna izborna komisija BiH, u periodu nakon raspisivanja izbora. Uz popunjenu i potpisanu prijavu podnositelj prilaže i dokaz o identitetu i podatke o tačnoj adresi u inostranstvu, te izjašnjenje o opciji glasanja u diplomatsko-konzularnom predstavništvu ili putem pošte.

Takođe, nakon obrade prijave žaliteljica je putem e-maila dana 29.07.2022.godine obaviještena da njena prijava za glasanje izvan BiH sadrži nedostatke. Navedene nedostatke žaliteljica nije otklonila u roku od dva dana od dana prijema obavijesti. Kako se radi o prekluzivnom roku koji se ne može produžavati, to je pravilno CIK BiH odbio njenu prijavu za upis u izvod iz Centralnog biračkog spiska za glasanje izvan BiH.

Napomene radi, žaliteljici nije oduzeto biračko pravo za Opće izbore 2022.godine, nego samo mogućnost glasanja putem pošte izvan BiH, jer isti može glasati na redovnom biračkom mjestu u općini u kojoj ima prijavljeno prebivalište u BiH.

S obzirom na navedeno, po ocjeni ovog vijeća, pobijana odluka Centralne izborne komisije Bosne i Hercegovine je pravilna i zakonita, a žalba neosnovana, pa je istu, primjenom odredbe člana 81. stav 1. Zakona o upravnim sporovima Bosne i Hercegovine (Sl. glasnik BiH br. 19/02 do 74/10) valjalo odbiti.

U odnosu na žalitelje Alić Saliha, Alić Habibu i Alić Šejlu, žalba je odbačena kao nedopuštena.

Uvidom u spis predmeta Sud je utvrdio da je žalbu u ime Alić Saliha, Alić Habibu i Alić Šejlu izjavila Alić Emina sa e-mail adrese ..., bez punomoći za podnošenje žalbe na spornu odluku.

Obzirom da žaliteljica nije dostavila punomoć za izjavljivanje žalbe na pobijanu odluku Centralne izborne komisije BiH, to se ista ne može tretirati kao dozvoljena i izjavljena od ovlaštenog lica.

Kako je po shvatanju apelacionog vijeća žalba izjavljena od neovlaštenog lica, u smislu odredbe člana 180. stav 3. Zakona o parničnom postupku pred Sudom BiH („Službeni glasnik BiH“ broj: 36/04, 84/07 i 58/13), to je istu, analognom primjenom člana 191. stav 1. tačka 1. citiranog zakona, a koji se primjenjuje temeljem odredbe člana 60.a) Zakona o upravnim sporovima Bosne i Hercegovine („Službeni glasnik BiH“, broj: 19/02 do 74/10), valjalo odbaciti kao nedopuštenu

**PREDSJEDNIK VIJEĆA
S U D I J A**

Zvezdana Antonović